

拜經樓藏書題跋記

拜經樓藏書題跋記卷二

海昌吳壽陽虞臣纂

史記

史記索隱帝紀十二年表十書八世家三十列傳七十
每篇首題第幾不稱卷俱小名在上大名在下每葉二
十八行行二十五字蒙古中統二年刊 錢辛楣宮詹

養新錄云予所見史記宋槧本吳門顧抱冲所藏澄江
耿秉刊於廣德郡齋者紙墨最精善此淳熙辛丑官本
也黃蕘圃所藏三山蔡夢弼刊本亦在淳熙間海甯吳
槎客所藏元中統刊本計其時在南宋之季此三本皆
有索隱而無正義明嘉靖四年莆田柯維能校本

金臺汪諒

刻始合索隱正義爲一書前有費懋中序稱陝西翻宋本無正義江西白鹿本有正義是柯本出于白鹿本矣同時震澤王氏亦有翻宋本大約與柯本不異史記索隱正義皆各自爲書不與本書比附宋南渡後始有合索隱於史記者朔自蜀本繼有桐川三山兩本皆在清熙以前其時正義猶單行也白鹿本未審刻于何年以意揆之必在清熙以後蓋以索隱爲主而正義輔之凡正義之文與索隱同者悉從刪汰自是正義無單行本而守節之元文不可攷矣又日記鈔云海甯吳槎客以元中統二年刻史記索隱本見示首有校理董浦序云平陽道僉幕段君子成募工刊行者也

黃蕘圖有南宋蔡夢弼本亦與

中統本同有集解
索隱而無正義

又記堯圃主事所藏史記南宋大字

板不全本云相如乃與馳歸成都家居徒四壁立今本
無成都二字子虛賦赤玉玫瑰注郭璞曰赤玉赤瑾也
今本注無赤玉二字此本馳歸成都與大字板同賦注
無赤玉二字按始皇本紀金人十二重各千石柯板取
正義不刻索隱北監及馮本此段注在置廷宮中下

先君子記云元中統刻史記索隱有中統二年校理董
浦序按元世祖中統二年爲宋理宗景定二年辛酉然
則此書雖署元號年其實宋刻也汲古閣專刻史記索
隱世稱善本餘刻皆芟節不全此本校毛刻注尤備卷
首有史類正史史記三朱印蓋山陰祁氏淡生堂藏書

前漢書

宋本前漢書列傳十四卷每葉十六行行十六字首行
大名在下小名在上次行題漢護軍班固撰三行署唐
正議大夫行秘書少監瑯琊縣開國子顏師古集注並
與監本不同詳先君子跋語中卷末書右將監本杭
本越本及三劉宋祁諸本參校其有異同並附于古注
之下後記正文注文字數筆畫工整紙墨古雅洵宋刻
之最佳者仁和朱朗齋明經跋云余館武林汪氏者
垂三十年汪氏有振綺堂爲藏書之所與同郡諸藏書
家若小山堂趙氏飛鴻堂汪氏知不足齋鮑氏瓶花齋
吳氏壽松堂孫氏欣託山房汪氏皆相往來彼此互易

借鈔借校因得見宋槧元鈔不下數百十種然其中關係經史之大者無多惟欣託山房有魏鶴山儀禮要義一部爲經學失傳之本壽松堂有溫公通鑑一部較外間明刻本多增所未備洵有補於史學今儀禮要義已爲吳興嚴氏所得僅錄副本藏家而通鑑一本屢屬孫氏刊板流傳以卷帙繁富窘于資力而止僅以卷首一序刻入抱經堂盧氏羣書拾補中甚矣古書留遺大爲考據家裨益而傳播之不易若此此本前漢書祇十四卷中尙有關翻然開卷標題卽與今本迥異況其中字句之不同與註釋之詳略乎兔牀吳氏以重價購得乾隆癸丑新正二十一日余停舟造訪獲觀于拜經樓下

流連竟日不忍釋手因勸兔牀翻刻以惠後學並以余生平所見者覲縷書之以志予幸 吳縣黃蕘圃主事跋海甯吳槎客先生藏書甚富考核尤精每過吾郡必承枉訪并出一二古書相質然儀舟匆匆未及暢談余亦不獲舉所藏以邀鑒賞也頃同陳仲魚過訪茶話片時歷歷述古書源流俾得聞所未聞實爲忻幸其行囊攜得漢書殘宋本數冊字大悅目在宋槧中信爲佳刻余所藏景祐本外卻無別本可對惟范史亦有此十六行十六字本與此本當是同出一時卷第下撰書注書亦分兩行蓋款式同也其中字句之不同與註釋之詳略余固未及取景祐本相勘而紙墨精好有過之無不

及矣且余所深服乎槎客者如此種殘編斷簡幾何不爲敝屣之棄而裝潢什襲直視爲千金之比可謂愛書如性命又得同志之人勸其翻雕以惠後學始幸天壤之大不乏好古之士特恐卷帙繁富窘于資力盡與孫氏等耳槎客當亦以余言爲然 東里盧抱經學士跋汲古所梓漢書當是據北宋本此疑是南宋本誤字亦少汪文盛本殆亦從此本出今世所通行者顏注尙有脫落何論蕭該子京三劉而此獨全可寶也然余則謂設使當世有重雕者其款式自當依此其文字有斷然知其誤者不必因有宋人校語而反改不誤者以使之誤在擇而取之可也如是將使後人寶我 朝之本轉

勝於寶宋本多多矣余老矣槎客彊力有餘當亟圖之
余亦當亟沒少佐其成焉

吳越春秋

右漢魏叢書中吳越春秋六卷先子從元刻補鈔目錄
十卷并徐天祐序及天祐補注九條後有大德十年校
刊姓氏題後云吳越春秋十卷本元徐天祐音注刻漢
魏叢書者削去天祐之名又併其卷爲六盡失本來面
目明人刻書往往如此可歎也茲從元刻吳越春秋補
鈔序目附釘於前而大德年中校刊諸人姓名官闕亦
附錄于後庶使觀者知舊本之可貴云乾隆丙午夏吳
某記

戰國策

右三十卷鮑彪注元吳師道本刻於至正十五年每葉二十行行二十一字卽吳門黃氏新刻剡川姚氏高注本所稱至正乙巳吳氏本者是也首列劉序乃自孔子曰以上誤冠鮑彪序四百餘字於前而鮑序故興亡亦有補於世句及作序年月誤綴於劉序後姚氏本不誤卷二秦假道於周以伐韓下別爲一章姚氏本合前爲一餘並詳蕘圃先生札記中

資治通鑑

明陳氏刻本朱墨黃三色評點最爲精密先君子題卷首云資治通鑑爲慈谿裘庶常閱本庶常名璉康熙

乙未進士除翰林院庶吉士深于史學評點通鑑凡五次

通鑑紀事本末

宋袁樞通鑑紀事本末四十二卷每葉二十二行行十九字前有淳熙元年楊萬里寶祐五年趙與憲元延祐六年陳良弼三序趙序嚴陵舊本字小且訛乃易爲大書精加讐校以私錢重刊之云云陳序謂節齋患嚴陵本字小且訛於是精加讐校易爲大字刊板而家藏之凡四千五百面可謂天下之善本也頃年士學陋藝苑蕪此版束之高閣者四十餘年又懼其爲勢家所奪也秘不示人一日節齋孫趙明安者過嘉禾謁學宮目擊

余所爲若不懈者乃歎曰吾有所託矣始出所藏書版示余會御史朱公一齋僉憲鄧公善之按臨是邦乃出中統鈔七十五定價之趙亦不計也因書得版頭末于節齋敘次後之官于學者庶幾知所寶焉云云蓋是書刻于宋寶祐中印于元延祐閒此本爲明嘉靖閒印行者中有補刊缺葉原本缺筆避諱之處悉仍其舊未改宋刻面目是可貴也

宋史全文

此書三十六卷目錄題續資治通鑑長編前冠以乾道四年李燾進書表每卷首則題宋史全文續資治通鑑三十卷後每卷題增入名儒講義續資治通鑑長編三

十六卷末又編度宗少帝事稱宋季朝事實不著撰人名氏惟列豐城游明大昇校正一行蓋蒼萃諸家紀傳而成者紙墨精好每葉二十二行行二十五字前有長墨印云宋史通鑑一書見刊行者節略太甚讀者不無遺恨焉本堂今得善本乃名公所編者前宋已盛行於世今再繡諸梓與天下士大夫共之誠爲有用之書同視宅本大有徑庭具眼者必蒙賞音幸鑑觀此印可見元時坊刻之精密惜缺二十二二十一兩卷

宋中興通鑑

宋中興通鑑十五卷前有竹垞老人題云宋中興通鑑一十五卷通直郎國史院編修官劉時舉編史嵩之喪

父以右相起復時舉爲京學生與王元野黃道等九十
四人鈔本重四字今校正太學生黃愷伯金九萬孫翼鳳等百四
十四人武學生翁日善等六十七人宗學生趙子寰等
三十四人上言爭之是亦慷慨之士也觀者嫌其太略
然以視王宗沐薛應旂所撰斯條理過之矣小長蘆七
十九老人朱彝尊題此跋見曝書亭集

通志

通志二百卷元刻本每葉十八行行二十一字字大悅
目前有吳繹序云是集繡梓於三山郡庠亦旣獻之天
府藏之秘閣然北方學者猶未之見余叨守福唐洪惟
文軌會同斯文豈宜專美一方迺募僚屬仍捐己俸稟

之省府摹稭五十部散之江北諸郡至治二禩壬戌夏
五郡守可堂吳繹書於三山郡齋又有至治元年五月
福州路總管吳繹題疏後刻至治二年九月印造並列
諸府路等街名紙墨精好首葉有談氏延恩樓收藏印
圖記

綱目贅言

鈔本綱目贅言十卷 國朝張如錦撰前有彭甯求序

十六國春秋

右十卷明屠喬孫項琳之重訂本 先君子條記云浦

起龍注史通云十六國春秋賀燦然序有晉紀流行鴻
書汨沒之語今此本無賀序又書養新錄一條上云按

喬彞等十六國春秋序自謂輯錄陳編原未嘗作僞欺人如於陵子及天祿閣外史之比也又書云嘗見毛斧季賣書與潘稼堂目錄有十六國春秋云此是崔鴻真本然則鴻真本猶未作廣陵散邪

讀史紀要

梅村先生手鈔本嘉慶乙丑先君子以示吳門黃堯圃主事云的係先生親筆因出所藏先生手寫綬寇紀略共觀與此筆跡無異洵可寶也前有秀水朱氏潛采堂圖書記方印

遼史拾遺

鈔本遼史拾遺四冊吳江楊慧樓進士跋云樊榭先生

著述等身而援引精博則推遼史拾遺爲冠四十年前
廣陵馬氏曾擬剞劂而未果海內鈔藏者寥寥數家而
已容秋海甯吳丈槎客慨舉知不足齋贈本假鈔以數
年願見不可得之書一旦得繕錄全帙登諸篋衍快何
如之庚戌夏六月校畢因識數語於後以誌幸至堇浦
先生金史補闕卷帙更鉅身後散佚罕存欲謀璧合而
竟無自矣惜夫松陵楊復吉識 先君子跋云吳江楊
慧樓進上既從予借鈔遼史拾遺又作遼史拾遺補凡
數百條惜予卒卒未及傳錄又云鮑綠飲云此書向爲
樊榭姪繡洲所藏人有借鈔者繡洲撤出一卷以借之
故外間傳本多不全惟此爲足本也

明史稿列傳

右六十一冊 先君子跋云萬季野先生所撰史彙方望溪侍郎以爲四百六十卷諸志未成全謝山庶常以爲五百卷今此僅列傳二百六十七卷雖似未全蓋華亭開雕時亦尚有刪併也周松靄大令云此書卽查東山之罪惟錄故有朱康流張待軒傳及海甯俞子久事然予未見罪惟錄不敢懸斷識之以俟知者又云此書予藏之數十年姚江邵子桐編修見而極愛之以爲此舊唐書也在西湖書局中借閱累年後竟攜以入都屢索不還屬武林友人往取之酬以二十金始得昔人以借書還書等爲一癡殆是之謂歟然予實一片苦心終

不以是爲悔後人能體此意亦可云文章紹編槩矣

季漢書

季漢書六十卷 先君子手錄周耕厓先生跋於末並
先生手札云季漢書後明知僭妄陳君澆坳見之謂少
連亦苦志之儒攻擊未免太甚後遂不敢以示人既思
少連信苦志矣庶子苦心枉被後人醜詆獨可聽之亦
恐失平久仰吾兄卓識高才特以就正意在奉求斧削
乃卽過蒙採錄又恐獎借太過矣 先君子跋云右亡
友周勤補孝廉季漢書跋見於蓬廬文鈔勤補自少好
學工文讀書具有卓識此跋灑灑千餘言反覆辨論援
據賅洽眞能直揭作者之心事而息千載後聚訟之喙

子故錄之於季漢書之後以告讀史之君子

江表志南唐拾遺記新舊唐書雜論

三種合爲一冊江表志三卷耕厓先生依閩汀文選校頗多補正並云按閩汀文選中所刻江表志及南唐近事每種作一卷不分三卷南唐拾遺記先師朱巢飲夫子暨先君子校耕厓慧樓二先生亦均借閱新舊唐書雜論慧樓先生校正並跋云李西涯新舊唐書雜論懷麓堂集所不載客冬假海甯吳丈槎客藏本讀之樹義明快洵堪與范滂甫唐鑑並峙第其中訛脫孔多而侯君集許敬宗晉王治三則舛錯淆雜幾於不復可句讀因爲校正錄副用誌賞析辛亥寒食日覆校畢並記

南唐書注

右南唐書注十八卷周在浚著後附戚光唐年世總釋
馬令南唐書建國譜吳非三唐傳國編年圖楊維禎正
統辨李清南唐書年世總釋前論邱鍾仁南唐承唐統
論前列趙世延南唐書序沈士龍胡震亨題辭此書武
原張文漁徵君得於易州山中 先君子假得與先師
朱巢飲夫子取家藏各書逐條校勘凡異同悉筆之簡
端復經周耕厓先生校訂粘簽數百條後有二札一云
雪客南唐書注大費苦心老年長兄政暇能卽付之梨
棗誠不朽盛事矣一云雪客南唐書注偶攜過竹西曹
荔老轉託伊弟燕客郡丞勸其開雕弟念年世兄已刻

馬陸二書今又復鋟此注未免近複故不復辭已鈔副
本寄之原本統俟錄成彙繳可耳二札俱不書名氏
先君子謂是朱竹垞先生與蔣蘿村先生札 陳無軒

學博跋云乾隆戊戌十月十二日芑堂來保定遂訪友
於易州山中得是書冒雨衝寒而至喜不自勝洵一段
奇緣也芑堂急欲南行余未暇細讀惟屬卽付開雕公
諸同好云十七日置酒觀古堂畫畢月出記之 先君
子跋云大梁周雪客先生南唐書注當時最有名以未
有刊本故流傳絕少昔襄平蔣蘿村梅中兄弟合刻馬
陸二書時曾得此校閱旣以示朱竹垞檢討竹垞極賞
之謂蘿村已刊馬陸二書是以不復從與攜過廣陵曹

荔惟先生見之勸其弟燕客郡丞開雕卒亦未果迄今
又七十餘載矣吾友張君文漁從易州山中得此書數
千里懷之以歸喜不自勝亟謀付之梨棗予閒從借讀
觀其徵引之富真竹垞所謂具費苦心者第其間亥豕
脫謬尚所不免因與朱君允達據予家所有之書逐條
校勘凡諸異同悉筆之簡端還以質於文漁至於注中
有繁者宜芟複者宜去互異者應別其是非附傳者當
標其出處若斯之類皆私心所未安而深有望於二三
同志之共訂者也文漁博雅嗜古汲汲以表章爲事試
更以芻蕘之言斟酌盡當而刊焉非特爲山陰陸氏之
功臣抑亦雪客先生之益友矣庚子端陽後二日跋

耕厓先生跋云歲壬寅從免牀借觀是書於王氏藜照
書屋隨頁粘簽十年以來奔馳南北忽忽幾忘之矣壬
子春因纂修廣德州志意其注中事有涉廣德者復借
閱一過修檢舊簽竟無新得以益之二壬之間白髮頻
添依然故我可歎也歲暮攜歸輒附數言於末十二月
一日海昌周廣業識

南部新書

南部新書十卷舊鈔本 先君子從緣飲先生借手鈔
本照錄諸家校勘於上並補錄首序並王聞遠叔子及
貞復堂二跋又附錄厲本延祐丙辰子貞子洪武五年
清隱老人正德十年約齋辛丑清常各校雍正庚戌蟬

花居士乾隆乙酉貞復堂諸跋乙未歲先君子復從
著書齋借稽古堂刊本重校識後云乾隆乙未閏十月
又從周范兮先生借得高寓公稽古堂刊本重校凡鈔
本中有原字與刻本同者不復注刻作某有不同字而
刻本顯然紕繆者亦不復注甲辰歲簡莊徵君又以
陳宋齋先生藏本互勘跋云此吳槎客先生手校本也
乾隆四十九年三月海鹽館中有茗人持鈔本見示乃
家宋齋先生書巢舊藏會予以寒食解館歸語槎客先
生先生出此本屬爲覆勘因復攜至館中自三月二十
五日至二十七日夜半勘畢凡紫筆者皆是合諸先生
所校是書可稱善本矣新坡陳鱣記於六十四硯齋

嘉慶乙丑 先君子又補錄陳本逢年一跋其壬集內
智永千文律召調陽一條 先君子辨云按六朝人最
精音韻之學周散騎千文妙處尤在雙聲疊韻一起一
結四句中便有五雙聲中間更難悉舉此律呂與上句
成歲並雙聲斷不容改呂爲召況律呂對閏餘彌覺工
穩而律召殊屬牽強智永一人之書豈可遂據爲典要
總由唐以後學者置此道於不講故希白亦有此論耳
自時厥後凡書千文者率以召易呂使散騎抱怨於地
下殆將千載余特爲辨之如此以俟知者正之

錢塘遺事

右鈔本十卷吳門家枚菴先生手校 先君子跋云錢

塘遺事十卷昨歲從澈水吳子應和借得倩族姪禹敷傳錄今年春偶攜姑胥以示宗人伊仲伊仲適有藏本因爲余校正凡硃筆皆是也此書展轉不出吳氏亦奇伊仲名翌鳳博學彊記遇異書輒手自鈔校蓋今日之方山也乾隆丁未重陽後四日誌 簡莊徵君又從文淵閣本校補數處跋云有宋遺民臨安劉一清謨錢唐遺事十卷世無刻本陶南邨說鄂載之僅得數條今夏寓吳門購得是書蓋從文淵閣鈔出猶是足本但書經三寫誤脫甚多既歸訪兔牀明經於小桐溪明經出舊鈔本見示曾經吳中吳伊仲手校者頗爲精詳遂借至津逮舫中互相勘正并錄明經跋語時方秋半爽氣迎

人適偕明經遊杭連舫共泊對酌論文連日登山臨水
閱市訪舊殊多樂事一夕徐步玩月坐橫河橋共談錢
唐遺事娓娓忘倦明經復誦岳倦翁玉楮集詩數首不
禁感慨係之歸途校畢備載於此嘉慶十年秋八月既
望陳鱣記

高麗圖經

讀書敏求記高麗圖經四十卷宣和六年徐兢奉使高
麗撰圖經四十卷凡三百條物圖其形事爲之說上之
御府乾道三年徐兢鏤板澂江惜乎圖亡而經存兢字
叔明張孝伯與作行狀附刊於卷末先君子書敏求
記云今世所傳鈔本僅說數十番又不如本矣觀震

川先生集中跋此書之語則叔明之志亦可取也辛亥
冬日有書賈持來舊鈔高麗圖經四十卷凡二百餘番
前列兢自序後有其兄子歲記得書顛末及刊梓歲月
卷末有海鹽姚士舜及鄭宏跋又有乾道元年張孝伯
作徐兢行狀 簡莊徵君跋云宣和奉使高麗圖經四
十卷宋徐兢撰靖康之變圖亡經存乾道三年從子歲
刻於澂江郡齋明末海鹽鄭休仲重刊近吾友鮑君以
文復以家藏善本刻入知不足齋叢書校補鄭本脫字
凡數千又正二十七卷錯簡數條允推善本嘉慶九年
冬十月同里吳槎客先生以所購鈔本見示蓋卽鄭刊
本錄出者因攜至吳門從黃君紹武借得舊鈔本并取

鮑刻本互爲校訂補其闕字惟錯簡尚須舊錄聞吾郡
趙氏小山堂藏有高麗本不知刻於何時前在京師遇
高麗使臣朴君修其詢及是書云彼國刻本尚多惜行
笈中未曾攜帶耳嘉慶十年春二月望日書於江陰縣
署地卽澱江也

又

知不足齋叢書中刻本緣飲先生從宋本校格式行款
及字句同異俱親手塗改添補蠅頭細楷丹黃粲然彌
足見先生讀書之精審

武林舊事

武林舊事舊鈔本其精綠飲先生題云癸卯十一月三

十日得此於集英堂 前有鶴谿主人笠澤曹炎之印
彬侯四圖記前六卷用朱絲細格中心有山暉艸堂字
楷法端整似卽繕寫付梓者後有至元後戊寅忻厚德
用和父跋明宏治乙卯從靖跋二跋之前有 國朝康
熙丁巳陸貽典跋云遵王鈔本前六卷舊鈔缺後四卷
命工寫足馮季假得旣屬竇伯校此又挽余校一過頗
多是正處朱筆出竇伯手墨筆蓋余所校也此本係余
姻友孫岷自舊藏岷自不祿屈指已十有三年矣撫此
不禁人琴之痛康熙丁巳小春下浣覲菴陸貽典識於
山涇老屋 己卯仲秋管君芷湘以是書見眎屬校因
取家藏鈔本校勘一過頗見其善是本亦緣飲火手校

彌足寶貴且卷九祈請使行程記多十一二十三三
日事余家本亦缺惜無題識未詳從何本校出耳余本
係吳中家枚菴丈校正又經陳簡莊徵君從閣本補校
與此互有得失茲得合勘庶益美備矣十月十八日壽
賜記

金陀粹編

金陀粹編二十八卷舊刻本按辛楣宮詹潛研堂文集
跋云初編刻於構李續編刻於南徐端平甲午又合刻
藏於盾塾皆有倦翁自序元季重刻於杭州西湖書院
則有臨海陳基會稽戴洙二序明嘉靖壬寅晉江洪富
刊於兩浙運司後十七年莆田黃日敬復修補其漫漶

者然中多斷簡脫葉惜無善本是正也陳敬初序謂孝宗受禪珂始以籲天辨誣錄詣闕訴上由是詔賜墳廟復爵位頒封諡錄遺孤今攷孝宗受禪在紹興三十二年壬午忠武得昭雪復官由於太學生程宏圖之上書而倦翁之進籲天辨誣乃在嘉泰四年丙寅相去四十五載又二十八年至端平甲午倦翁尚里居無恙然則孝宗受禪時倦翁恐猶未生安得有詣闕上疏之事本書所述年月前後分明易於尋檢陳何不攷至此此本有陳序當卽宮詹所稱元季刻本前有虎林樵者清時莖史高孚玉易居士諸圖記中多朱筆點定序內飛父子沒餘二十年至以謝天下云云改作沒餘七十載尚

書史浩首言岳飛久寃詔賜云云是也其孫珂實始以
顛天辨誣錄詣闕訴上吾意宋君其北望舊京必恨不
誅秦檜以謝天下並書其上云□□之辨於甯宗□□
四年蓋與孝□□禪相距四十餘□□此云云豈非誤
□撰文時失於檢點□□今改正之其說適與官詹同

宦夢錄

鈔本宦夢錄四卷附紛紜行釋八首夜問九章屏居十
二課有高兆跋云湘隱先生著撰嘗從其長公元虛教
授所借觀請鈔教授許刻成寄貽遂載之豫章越二載
教授客死書散佚吾友郭君殿見於延平語余訪之僅
得此四卷命用溪衲環峯鈔歸爲之三歎己巳六月七

日高兆識又徐鉉跋云辛未夏余客三山曾從侯官高固齋所鈔得黃相國東崖國史唯疑口卷今又借鈔此本已三年矣時康熙甲戌六月再游閩中記菊莊徐鉉

國壽錄

國壽錄四卷後有便記十二篇前列編輯例言不著名

氏 先君子書云以上例言未審何人所作其云扶風

氏藏爲插花山舊本嘉慶壬戌予七十初度陳奉峩茂

才手錄此本見貽其原本則又從周勤補孝廉借鈔也

辛未七月記 其攀髯疑案江陰疑案二篇原本亦列

錄中標題曰襄城伯李國楨傳中書戚藩傳例言辨其

非入之便記以爲此二事者當時要別有其人特湮沒

不傳遂以訛傳誤耳今既知其非李與戚也雖其人不
可攷而使人聞其事想見其爲人而爲之低徊感歎亦
足不朽矣且傳其事庶或終知其人乎謹標之爲疑案
世有博識將質成焉 先君書甲申傳信錄襄城伯一
條於拳髯疑案後並識云此傳與綏寇紀略第十二卷
下虞淵沈中所記李國楨殉節事並當是傳聞之訛

又書傳信錄一篇後云右錢士馨甲申傳信錄跡鋪遺
稿一條偶讀查傳例言及跋故鈔附於此愚按此編蓋
伊璜先生當日隨其見聞劄記未經詮覈之書故如襄
城傳既書其節槩如此之烈而逆閹始末則又云賊奸
細滿都城閣臣魏藻德勛臣李國楨俱願爲內應豈不

自相矛盾乎由是以觀蓋不獨戚藩戚勳之訛矣書
江陰疑案後云按晞明江上孤忠錄作中書舍人戚勳
以紅筆大書於壁閣門焚死而無戚藩其人蓋藩乃勳
之訛也 又書逆闖始末中副將周遇吉獨閉關相距

大摧李兵百姓縛遇吉出李磔之數語上云綏寇紀略
遇吉運矛策馬入賊中堅手刃巨賊百餘人矢攢甲如
蝟毛身被數十創而死豈有百姓縛出之事乎 賜按

甲申傳信錄謂國楨既不能死欲求苟活而卒被刑戮
好事者妄飾美談被之忠節以快聽聞何其誣也並舉
陳濟生再生記無名氏燕都日記所云以爲夢中語而
謂余四月入都亦聞此言逮五月遷城都民去襄城第

甚近言之最詳與前所聞大異而襄城誤國之論盈於
人口駙馬都尉冉興讓子五君者國楨之中戚也予詢
之亦云是當時傳聞異詞諸家傳記類多失實非訪諸
其鄉人至戚無從定其真僞宜東山先生此錄亦未覈
實耳

華陽國志

刻本向闕卷十中二子卷乾隆癸丑先君子借盧抱
經學士本補鈔並校又卷八永康八年詔徵刺史廡爲
大長秋一篇下補永甯元年春正月廡遣萬餘人斷北
道次綿竹以下四葉其餘字句脫誤同異補正處甚多
按程大昌演繁露云後漢傳贊注梁州北距華山之陽

南距黑水故常璩敘蜀事謂之華陽國志也

五國故事

五國故事二卷宋無名氏撰前有余寅序此本經綠飲先生校定余序云吾鄞少司馬范公建天一閣多藏書此蓋瑣品之一又云范司馬喜刻古書此編已入丹格未及梓而沒蓋此從范氏鈔出今已刻入知不足齋叢書中

南燼紀聞竊憤正續錄

二種並鈔本合爲一冊不著撰人名氏 先君子云南

燼紀聞淮海周煇著竊憤錄辛棄疾著皆相傳如此然

晁陳諸家均未著於錄

陽按家藏又一鈔本亦二種前多南渡錄大畧一篇並題辛去

疾著

錦里耆舊傳

錦里耆舊傳四卷卷一起中和五年正月至蜀武成元年卷二起武成三年盡同光四年春卷三起天成二年春二月訖僞蜀廣政二十五年卷四起廣政二十八年冬訖乾德四年春陳振孫書錄解題云八卷續傳十卷前應靈縣令平陽句延慶昌裔撰開寶二年秘書丞劉蔚知榮州得此傳其詞蕪穢請延慶修之改曰成都理亂記天成之後別加編次起咸通九載迄乾德四年百餘年蜀事大略具矣續傳蜀人張緒所撰起乾德乙丑迄祥符己酉自平蜀之後朝廷命令官僚姓名及政事

因革以至李順王均劉旰作亂之迹皆略載之知新繁縣太常博士張約爲之序 四庫目錄云四卷宋句延慶著一名成都理亂志志王氏孟氏據蜀時事陳振孫書錄解題作八卷述成書始末甚詳然謂此書起唐懿宗咸通九年此書實起僖宗中和五年又謂所記下迄祥符己酉此書實開寶中作不應預見祥符或所見別一續補之本歟 先君子記書錄解題上云按文獻通考經籍類引陳氏曰誤脫去自乾德至撰起凡二十二字張緒續記通志作張彭見崇文總目

宋紀受終考

右三卷程敏政著有成化十三年自序後有宏治四年

婺源戴銑跋其辨太祖太宗傳禪之誤以歐陽諸公正史爲據而疑湘山野錄之未實讀書敏求記野錄條下謂成化閒尹直等奉敕編纂宋元通鑑辨宋太祖太宗傳禪之誤蓋自李燾刪潤湘山野錄啟之并載野錄謂太祖太宗對飲燭影下時見太宗有不可勝之狀而燾改不可勝爲遜避太祖戮雪顧太宗曰好做好做而燾改戮雪爲戮地好做爲好爲之又加大聲二字遂不免有畫蛇添足之病此書辨之曰太宗留宿禁內此亦繆誤太祖旣不豫甯復自登閣且至殿廷戮雪乎其說更爲明快

六陵遺事

六陵遺事一卷後附庚申君遺事一卷並萬季埜先生所輯先君子手鈔校正並有按語

奉使西域行程記

右三卷題行在吏部驗封清吏司員外郎臣陳誠北京苑馬寺清河監副臣李暹謹進前有正統十二年國史總裁尹直序後附胡廣周孟簡鄒緝送行詩序

李侍郎北使錄

鈔本北使錄一冊不著撰人名氏首行題李侍郎北使錄先君子記云此錢遵王藏書

名相贊

名相贊五卷明尹直著起漢蕭相國迄宋文丞相前有

宏治甲子直自序後有宏治十八年歐陽雲序首頁有曹溶潔躬二圖記蓋秋岳先生舊藏也

備遺錄

備遺錄一冊不分卷題後學新淦張芹編輯後學清江敖英校正張序云錄中四十六人其爵里名氏皆閩中宋君端儀嘗采輯爲錄而未成者予因旁加考摭得其間二十餘人事略類而萃之以爲斯錄所載記皆靖難死節諸臣事蹟無考者二十六人第書爵里於後卷末敖英跋此冊亦倦圃藏書圖記與面頁題字並與名相贊同

泰昌朝記事

舊抄本一冊前署江上遺民李遜之輯有吳翌鳳家藏
文苑圖記蓋家枝菴先生藏本 先君子書後云嘉慶
甲子收得友人枚菴藏書蓋自君之別已三十餘載矣
不禁撫卷黯然

蜀難紀略

蜀難紀略婁東沈荀蔚著前列范文光沈華陽傳後附
李明睿金之俊吳偉業王時敏王發祥張王治吳國杰
孫以敬吳克孝毛天麒錢廣居郭奎先周亮工詔先生
跋所記爲獻逆破蜀荀蔚父雲祚死節事起崇禎十五
年至 國朝康熙三年與難始末凡二十餘載其記雲
祚之遇害也曰被幽於大慈寺逆遣其黨饋食以厚祿

相誘更以天命爲詞先君子擊案罵曰吾豈食賊粟哉
自兵敗時已不食求死不死何不速殺吾將助國滅汝
等也賊黨知不可屈往報逆逆大怒遂與御史理刑兩
劉公同遇害初御史及崇慶州知州王勵精皆與逆同
里人初疑之至是勵精聞省城陷卽朝服望北闕拜坐
樓上舉火自焚勵精嘗於壁上書文文山孔曰成仁等
語後二十餘年壁字猶如故及州民建祠奉公像祭甫
畢而壁適積其精誠所積如此而記獻逆之死也曰及
昇賊至猶張目瞪視於是斬首剖心心色純黑時十二
月十一日也獻逆稔惡滔天古今寡儔大兵誕將天威
爲天下復讐神人共快及傳首成都遺民競取其首提

擲刺割踐踏污穢無所不至雖大快心實恨其死之太
易聞埋尸處叢艸如棘觸之者皮肉糜爛又時有黑虎
噬人人皆遠之戾氣所鍾死而不磨如此

保越錄

保越錄一冊不著撰人名氏 四庫目錄云記元順帝
至正十九年明胡大海攻紹興張士誠將呂珍守據事
所記胡大海縱兵淫掠及發宋陵墓諸惡迹明史皆未
書張正蒙妻韓氏女池奴及馮道二妻抗節事明史列
女傳亦未載存之可補史闕也

歷代山陵攷

右二卷明王在晉奉敕纂

國朝山陵攷

明山陵攷二卷亦王在晉纂

諡法攷

右鈔本不分卷無纂述名氏其載明臣諡法至宏治十二年王越止

海甯倭寇始末

右一冊不著作者名氏 先君子校並有按語

柳邊紀略

柳邊紀略五卷楊賓著後一卷爲詩鈔本尚有缺字前有賓自序及費密潘耒林侗黃中堅王源諸公跋自序比於松漠紀聞南燼紀聞北狩革書之類

綏寇紀略

綏寇紀略三卷係未經刊刻者 先君子云以上三卷俱未有刊本綏寇紀略原十五卷又名鹿樵紀聞予有舊鈔本十五卷俱全太倉唐孫華有讀梅邨先生鹿樵紀聞七律六首見東江集乙丑六月志

鹿樵紀聞

右十五卷舊鈔本始鴉首火迄虞淵沈下末一卷爲附紀起漳泉海寇訖湖南各賊

明季甲乙兩年事蹟彙略

右三卷不著撰人名氏惟題東邨八十一老農隨筆前有順治改元沛澤老農自序其記李國楨事云朝廷發

三大營營齊化門外李國楨坐城樓無所主張唯以大
監王相堯統領又有賊執襄城伯李國楨至初時悍然
不跪賊再以危言恐之曰當屠一城人李乃跪曰吾爲
闔城求全也未數日發同諸人追銀夾二次已聞成國
公誅死卽白縊賊執其夫人云云與甲申傳信錄同卷一
起甲申正月初一至五月三十日卷二起六月初一至
十二月三十日卷三起乙酉正月初一至五月三十日

紀事本末備遺

舊鈔本紀事本末備遺二冊不分卷亦無序目撰人名
氏截去首冊爲遼左兵端熊王功罪插漢寇邊二冊爲
毛帥東江錦甯戰守東兵入口凡六篇

列女傳

吳中顧氏仿宋刻本 先君子以明黃刻本校朱巢飲
先生亦曾勘閱夾簽數十條

列仙傳

右二卷汲古閣刊本枚菴先生所藏有枚菴藏本枚菴
流覽所及二印記首沈汾序枚菴書云此首乃續仙傳
敘誤冠於此翌鳳記時丙申九月

拜經樓藏書題跋記卷二終

拜經樓藏書題跋記卷三

海昌吳壽暘虞臣纂

水經注

水經注四十卷明項氏刻本 先君以柳氏鈔本手校
每卷皆有題記卷末跋云山海經而後地理之書莫過
於水經而水經之所以超陵羣籍者亦籍有酈亭之注
存焉爾水經原水一百三十有七注中又得一千二百
五十有二包舉華夏囊括古今俾學者足不必踰戶庭
舉凡天下經流原委瞭然若指諸掌藉令郭宏農移山
海之筆而爲之絜長較短吾未知孰得而孰失也世有
修水道者執此以往非但神禹之遺跡可求卽管子所

稱三億三萬三千五百五十有九之數旁引曲證庸詎知不復見於今日耶惜閱時既遠習者久乏專家自唐以後闕失頗多宋館閣所藏止三十五卷蜀本僅二十卷故歐陽公且未見足本今幸復四十卷之舊而其間經注混淆訛文脫簡不勝悉數金源有蔡氏珪補正水經已不可復得自明以來校讐刊布者家數漸廣如楊氏慎黃氏省曾吾族人瑄陳氏仁錫鍾氏惺譚氏元春及項氏綱此本而南昌王孫謀瑋之箋爲最傳其用舊本傳錄是正者又有若歸氏有光舊鈔本趙氏琦美三校本朱氏之臣補正本全氏元立天敘吾騏三世校本馮氏夢禎勘定本錢氏曾依宋刻校本黃氏宗羲及本

孫氏潛再校本顧氏炎武校本黃氏儀校本并圖劉氏
獻廷注疏本姜氏宸英校本何氏焯再校本沈氏炳巽
集釋本全氏祖望七校本而柳氏僉影宋鈔本爲最精
他如周氏嬰閻氏若璩胡氏渭顧氏祖禹董氏燠杭氏
世駿齊氏召南皆嘗援據辨證以匡其失逮仁和趙氏
一清復博采史傳斟酌諸家之說繩愆糾謬定爲水經
注釋四十卷又別纂朱箋刊誤十二卷自謂集古今之
大成於桑鄺二家可稱功臣所遺憾者惟未覩柳氏本
耳按僉字大中吳人別號味茶居士書鈔於正德中前
有道元原序雖闕而不全顧別本皆無之吉光片羽洵
希世之珍也舊藏洞庭葉石君家旋亦散去予旣錄得

趙本又嘗慨慕柳本有得隴望蜀之想癸巳秋日吾友
鮑綠飲忽從湖墅友人齋頭獲見此本馳以告予爲之
狂喜彌日因亟從借歸出趙氏書中孫潛校補數處證
之壹皆膠合簡端雖不著大中姓氏定爲從柳本傳鈔
可無疑者欲影鈔一本卒卒未暇乃先取項本手爲讐
勘其不同者悉表而出之以資參攷始於癸巳季冬訖
於甲午仲秋凡九閱晦朔蓋百里外借書往來動多作
輟故也原本雖亦閒有亥豕然披沙簡金往往得寶在
擇之者何如耳嗟乎是一帙也趙君以畢生之力求之
而不可得予遇之若取諸懷袖何造物者之嗇於彼而
睚於此也抑書之遇不遇亦有時歟予旣自慶其遭略

取顛末而著於此後之得吾書者其寶之哉乾隆三十
九年重九日海甯吳某書於拜經樓 柳本酈序缺深
屏營也至枉渚交奇凡半葉此從新刻本補全每葉廿
二行行二十字記云乾隆丙申春從京師新刻本鈔全
酈序並校訛字此序蓋從永樂大典內錄出使人得觀
全璧何其幸也兔牀記此序行閒字數猶是宋板本來
面目又記又書卷首云柳本卷下俱有第字人名上不
署漢及後魏字後同凡硃筆注一作者俱柳鈔本柳本
經注皆白文無小注故此本小注並用乙

元豐九域志

元豐九域志十卷吳中家枚菴先生從青芝堂影宋本

錄出復以舊志校勘者每葉大字二十二行每行大字
二十二小字夾行每行二十三及二十四二十五字

先君子從枚菴借鈔並書其跋云新定九域志十卷青
芝山堂影宋鈔本復從元豐舊志校勘者首卷原闕四
京以下六版又脫曹州濟陰郡半版亦從舊志鈔補并
錄入進表一篇略成完書矣新定本較舊志增多古跡
一門朱竹垞謂舊志多經進之書此則民間流行之本
未知然否慨自祝穆方輿勝覽殘山剩水僅記偏安州
郡惟此與樂史寰宇記猶見全宋規模而流傳甚罕識
者所當什襲而寶貴之也乾隆戊戌秋九月枚菴漫士
吳翌鳳書 先君子跋云家枚菴僑居吳下性喜藏書

每遇秘本輒手爲傳錄蓋今之方山也王正仲九域志
流傳絕少而有古跡者尤爲難得癸卯夏從枚菴借得
因亟鈔而藏諸拜經樓又云壬子仲春復以錢遵王影
宋鈔本及嘉興馮氏新刊本重校一過

又

嘉興馮氏刊元豐九域志十卷 先君子以青芝堂鈔
本校跋云戊申秋日仲魚新購得錢遵王影宋鈔元豐
九域志卽從京師寄予予受而讀之庚戌仲夏南還復
以此本見遺蓋嘉禾馮氏新刊本也仲魚留心地學觀
其跋語足徵其討究之深馮氏復借影鈔本重校而補
刊各卷之後資仲魚之益亦不尠矣予習懶廢學慮遵

王善本留諸插架徒飽蟬腹因取遵王本仍還仲魚而
以予舊日所藏青芝堂鈔本九域志有古跡者重校一
過漫記于此

壽陽

按簡莊徵君得影宋鈔本馮氏借

校補刊各條於每卷之後徵君有書後一篇論黎陽大
伾山據本志復據宋史及文獻通考謂蔡氏書禹貢不
當以黎陽縣繫今通利軍爲王厚齋所未及者 先君
錄其文於此本之後

乾道臨安志

乾道志鈔本止三卷每葉二十行行十九字 先君子
以錢氏萃古齋新鈔本校錢氏本每葉十八行行二十
字 前有厲樊榭先生序云乾道臨安志十五卷宋臨

安府尹吳興周淙彥廣所修也此宋槧本僅一卷至三卷無序目可稽觀其稱孝宗爲今上紀職方至淙而訖其爲乾道志無疑吾郡志乘之有名者北宋圖經久已無考至南渡建爲行都則此志居首繼之以施愕淳祐志潛說友咸淳志皆爲宋人排纘予所見者祇有咸淳百卷向在花山馬氏吳君尺鳧鈔藏尚闕七卷趙君谷林復購得宋槧本之半固已珍如球璧今孫君晴厓從都下獲此志雖僅十之一二而當時官闕官署城市橋梁坊巷具存職官始末更爲詳晰諸家儲藏著錄未有及此者淙尹京時撩湖濬渠綽有政績載在宋史其書更可寶也亟錄副本而歸之樊榭厲鶚識後 杭堇浦

先生跋云長興周淙彥廣撰臨安志十五卷直齋書錄
譏其首卷爲行在所於宮闕殿閣全不記載其他沿革
亦多疏略此書世所罕傳萬厯中吾郡陳布政善修府
志時已不得見孫君晴厓得宋槧本於京師故家祇一
卷至三卷所載園亭坊巷及職方姓氏爲潛君高咸涖
志藍本其它惜無從更覓然斷圭殘璧爲此邦文獻計
已不啻寶如圖球志稱乾道三年五月二十六日左右
朝請大夫直龍圖閣兩浙轉運使知臨安府先是紹興
五年嘗通判府事宋史本傳但言宣和間以父任爲郎
厯官至通判建康府志稱乾道四年十月十四日磨勘
轉右朝議大夫五年七月初四日除右文殿修撰再任

本傳但言進右文殿修撰提舉江州太平興國宮以歸
無再任臨安事此可以補史之闕咸淳志載淙濬湖撩
草諸善政孝宗手敕獎諭本傳但言其開湖一事亦似
過略堇浦杭世駿跋

淳祐臨安志

淳祐志六卷每葉十四行每行大字十九小字雙行十
九簡莊徵君從吳中爲先君子鈔得同時黃堯圃主
事亦錄一本堯圃主事跋云今歲夏秋之交賈人從乍
浦韓氏得書數百種盛稱中多舊本書大都皆余所有
不復過問惟相傳有臨安志六卷本余甚疑之蓋乾道
則太多咸淳則太少遂就賈人處索觀其書卷中所志

涪祐而止余曰是必施諤臨安志也賈人初不知因余言遂信之擬與交易云已售出惜未歸之頃晤簡莊知是書在彼處外府之藏也當倩胥錄其副同人賦詩紀事簡莊倡而免牀與余和之洵爲藝林佳話云己巳季冬十有一月復翁書於石泉古舍 簡莊徵君跋云吾

杭在南宋建都爲臨安府其志凡三修一爲乾道時周

淙撰一爲涪祐時施諤撰四庫書目提要作施鑄杭堇補厲樊榭咸涪志跋作施悌

今黃堇圖與余定作施諤一爲咸涪時潛說友撰乾道志十五卷久

佚同郡孫晴厓從都下得宋槧本止三卷余曾錄副本

咸涪志百卷秀水朱竹垞從海鹽胡氏常熟毛氏先後

購得宋刻八十卷又借鈔十三卷尚 七卷後歸吾鄉

馬氏道古樓收藏錢唐吳繡谷購鈔其半繼而竹垞之
孫稼翁又以宋槧十七冊售於同郡趙氏小山堂趙氏
復從吳本補錄其餘未及裝整卽歸王氏寶日軒又轉
歸於吳氏存雅堂乾隆三十八年歛鮑綠飲從平湖高
氏得宋槧本二十一冊中閒節次缺失而盡於八十一卷
每冊有季滄葦圖記據綠飲跋云內第四卷至九卷實
季氏補鈔中稱理宗爲今上應是施諤淳祐志彙入餘
二十冊紙墨精好較勝趙氏本而六十五六兩卷又竹
垞所未見也因斥去季氏補鈔施志六卷就趙本補錄
通得九十五卷未幾歸於吾鄉吳氏拜經樓餘姚盧氏
抱經堂嘗從吳氏借鈔今爲余所得者也近客吳中有

持書目來者云平湖韓氏出售中有臨安志四冊因與黃君堯圖亟取觀之書凡六卷所列山川城府二門雖編爲卷一至六然前尚有缺卷其紀載至淳祐十一二年止避諱亦僅及理宗其爲沿祐志無疑殆卽從季氏本轉錄者乃以厚價購之攷直齋書錄文獻通攷及宋史藝文志皆不著錄而施之字里出處亦未詳明其時知臨安府事者爲趙與憲志中備載其建置倉敖設育嬰堂濬西湖開運河諸善政按宋史云與憲所至急於財利幾於聚斂之臣而盧熊蘇州府志稱其知平江適郡中饑分場設粥全活數萬人再守郡行鄉飲射禮於學宮復修飾殿堂齋廬廣弦誦以嚴教養弟子爲立生

祠熊之言當有所受則志亦未必虛譽兼可以證史傳
異文書雖不全良足寶貴遂與乾道咸淳二志共藏目
爲宋臨安三志并賦詩紀事嘉慶十有四年冬十有二
月海甯陳鱣書 詩云偶從吳市購得宋淳祐臨安志

六卷雖非全本然自來著錄家多未見喜而有作寄槎

客先生輸錢吳市得書誇道是西施入館娃

志爲施
諤所修宋

室江山存梗概鄉邦風物見繁華關心志乘亡全帙屈

指收藏又一家

同郡孫氏壽松堂舊藏宋本乾道臨安
志三卷先生書庫有宋本咸淳臨安志

九十五卷嘗刻一印
日臨安志百卷人家

況有會稽嘉泰本賞奇差足慰生

涯

同時購得嘉
泰會稽志

先君子和作云鳳舞龍飛詎足誇錢

唐遺事失宮娃天教南渡支殘局人想東京續夢華朱

鳥歌成空有淚冬青種後已無家與君鼎足藏三志

子舊

有乾道臨安志三卷咸淳臨安志九十五卷皆宋刻及影鈔本合此爲臨安三志云天水猶懸碧

海涯堯圃主事和作云甄別奇書卻自誇秦娥未許混

吳娃

淳祐志舊誤厠咸淳志中故借用闕疑向已無年

號

所見淳祐志鈔本皆無年號

微顯今還識物華半壁河山留六卷

累朝興廢得三家東南進取忘前鑑空使宗臣泣海涯

東南進取輿地通鑑三十卷考節先生趙善譽著卽陳氏解題馬氏通攷所云南北攻守類攷也宋刻藏無錫

某氏近始獲見因價昂未之買

又庚午春日寄懷先君子次前韻詩

云千元百宋競相誇引得吳人道是娃

謂好日娃見說文

我爲

嗜奇荒產業君因勤學耗年華良朋隔世亡雙壁

謂顧抱沖

袁壽

異地同心有幾家眞箇蘇杭間見廣藝林佳話徧

天涯

仲魚得清補志
卽佳話之一

咸淳臨安志

宋大字本咸淳臨安志九十五卷每葉二十行每行白
文二十注文雙行二十字綠飲先生得於平湖高氏以
歸先君子凡宋刻二十卷影宋鈔七十五首有季滄葦
圖記卷帙與傳是樓宋板書目相符蓋東海舊藏原本
盡於八十一卷內五卷至第十卷乃施諤淳祐志屢入
綠飲先生撤出此六卷從王氏吳氏影宋補鈔較竹垞
先生所見本多六十五六十六二卷鈔本經沈君煥校
正書其前云乾隆丙申三月初十日武林沈煥校又云
是書鮑綠飲借鈔於壽松堂孫氏檢書者不依卷數亂

發隨借隨鈔亦卽隨校覽者幸毋以參錯爲嫌煇又識
每卷後皆記校對月日又九十七卷後書云乾隆四十
二年歲次丙申二月望後假壽松堂孫氏本鈔補四月
二日鈔畢七日校訖計補八百頁 又耕厓先生識云
四月三日閱竟風日和美綠陰滿窗時將迎夏矣廣業
先君子嘗欲取乾道臨安志成化萬歷二杭州府志
補其缺卷未有成書曾手定序錄一冊至百卷後有附
錄七則並錄朱吳杭鮑四先生題跋 竹垞先生跋云
南宋咸淳四年中奉大夫權戶部尚書知臨安軍府事
縉雲縣開國男處州潛說友君高葺正府志增益舊聞
凡一百卷子從海鹽胡氏常熟毛氏先後得宋槧本八

十卷又借鈔一卷三卷其七卷終闕焉宋人地志幸存者若宋次道之志長安梁叔子之志三山范致能之志吳郡施武孚之志會稽羅端良之志新安陳壽老之志赤城每患其太簡惟潛氏此志獨詳合以吳越備史中興館閣錄續錄都城紀勝武林舊事夢梁錄大滌洞天志庶幾文獻足徵惜後之作通志者目未覩此以致舊聞放失可歎也夫秀水朱彝尊 尺鳧先生跋云咸淳臨安志原本舊藏朱氏曝書亭後歸花山馬氏道古樓今入桐鄉汪氏書庫世人不可得見矣所闕者凡七卷竹垞竭平生之搜括竟不能見合浦珠離平津劍失世間神物自有護持不知吾生可能得遇否康熙辛卯從

馬氏乞鈔予錢二十千凡三年僅得半部更請於書主
付繡谷亭別令楷書生錄完并假前半部手自校定先
後歷十年餘至雍正元年癸卯始得裝訂成一書之難
如此錢塘吳焯 堇浦先生跋云咸淳臨安志縉雲潛
說友君高譔說友史家不爲立傳其序末列銜云云存
此可以見說友之官闕書凡百卷舊藏花山馬氏吾友
吳君尺鳧以二十千購鈔其半其半則得之王店朱氏
檢討家碑刻七卷仍闕如也好事者往往從吳氏借鈔
鈔胥憚煩每割去大文長記以是世鮮善本辛亥歲夏
同在志局尺鳧攜是書來予與趙誠夫共相參校乃得
睹悉眞贋輒歎求書之難適檢討孫稼翁以宋槧十七

冊求售亟從與誠夫以三十金易之山川古跡祠廟寺
觀湖志全弋獲於此吾郡之文獻又無論也施愕淳祐
志久佚不傳說友聞一稱引之序所謂漏且舛者也後
陳布政再修爲能胚胎前光稱杭之善志其賢於夏大
理遠矣秦亭山人杭世駿先君子云按吳繡谷跋所
藏咸淳臨安志謂子錢二十千僅鈔半部蓋謂以錢子
馬氏之掌書者也其後復從書主借其半鈔全無得之
王店朱檢討家之說又考所闕七卷爲第六十四六十
五六十六三卷並人物第九十九十八九十九三卷並
紀文第一百卷乃歷代碑刻目跋中所言碑刻七卷仍
闕如也似皆未得其實 綠飲先生跋云宋咸淳開潛

說友撰臨安志百卷，歷世寔久，傳本絕少。我朝朱檢討彝尊，先後從海鹽胡氏、常熟毛氏得宋槧本，去其重複，輯成八十卷。又從他氏補鈔十三卷，尚闕七卷，無從補錄。其跋載曝書亭集中，檢討既沒，歸之花山馬氏。道古樓馬復售之桐鄉汪氏，今則散佚，莫可踪跡矣。方在道古樓時，錢塘吳繡谷先生從之借錄，予錢二十千，僅得其半。又歷十餘寒暑，始畢業焉。雍正辛亥，檢討孫稼翁以重出宋槧本三十五卷售小山堂。趙氏、趙氏從吳本補錄其餘，未及裝整，卽歸北墅王氏。寶日軒頃復爲吳氏存雅堂所有。吳氏之居去予家祇數舍，予每欲借鈔，輒因病止。今年正月，偶得平湖高氏本，凡二十二冊。

中間節次闕失而盡於八十一卷每冊有季滄葦圖記以傳是樓宋板書目證之其卷帙相符蓋卽東海舊物

也內第四卷迄第九卷實季氏補鈔中稱理宗爲今上

應是施愕涪祐志屨入

賜謹按家藏本第四卷乃朱刻第五至第十並知不足齋補鈔

先生殆偶誤記耳

餘二十冊紙墨精好較勝於趙氏本而六十

五六十六兩卷又竹垞先生所未見也因拆去季氏補

鈔施志六卷就吳氏借趙本補錄凡影宋刻鈔者一十

六卷影鈔者二十八卷又影宋刻鈔序目三十八翻合

刻本通得九十五卷仍缺者第一卷卷首序錄二翻第

六十四卷及九十卷九十八卷至一百卷留心稽訪異

日或成全書未可知也吳本有繡谷先生手跋趙本有

董浦先生手跋記述頗詳并錄於左俾後之好古者有所徵信且知吳趙二家購求遺籍不惜重資有足法者嗟乎聚書藏書良非易事卽如泰興季氏花山馬氏桐鄉汪氏武林趙氏王氏以及健菴江邨之富且貴焉而此書不數十年間屢易其主若傳舍然況以余之薄弱其能長守而弗失乎亦冀後我者知所愛護而已乾隆三十八年歲次癸巳三月歛人鮑廷博題於知不足齋附錄癸辛雜識一條先君子書云按姑蘇志古今守令表說友以德祐元年四月二十五日罷二十六日婺州陳謙亨以浙西提刑兼攝平江府八月二十四日除司農少卿至九月十八日文天祥以制置使知平江府

按此是信國之前尚有陳謙亨攝平江數月也可補雜識之遺又升菴外集潛說友宋安撫使今傳奇中王十朋有此人訛爲錢先君子書云按傳奇雜劇往往假託人姓名而罕指實且王十朋紹興二十七年進士至咸淳時已百數十歲升菴之不檢每多如此

新安志

新安志十卷舊鈔本前題大宋孝宗乾道二年賜進士第中議大夫知鄂州軍府事新安羅願編有趙不悔序淳熙二年願自序按曝書亭集云古文至南宋日趨於冗長獨羅鄂州小集所存無多極其醇雅所撰新安志簡而有要篁墩程氏取其材作文獻志此志之最善者

予年八十始鈔得是書每勸新安富家開雕終鮮應者甚矣今人之不好古也潛研堂文集云汪廷俊世所指爲姦人也羅端良入之先達傳初無微詞後儒亦不以病羅氏蓋郡縣之志與國史不同國史美惡兼書志則有褒無貶所以存忠厚也公論所在固不可變白爲黑而桑梓之敬自不能已袁伯長四明志於史同叔但敘其歷官而云事具國史與此同意汪尚有善可稱史則其惡益著故文稍異爾志成於淳熙二年朱晦翁名位未顯且見存不在立傳之例而於韋齋傳末稱其讀書求志有四方學者推尊之語亦見其傾倒於朱也今本進士題名篇於朱名下注太師徽國文公六字則後人

所加

三山志

淳熙三山志四十二卷舊鈔本按曝書亭集云志閩地者晉有陶夔唐有林誦宋有林世程諸書均佚是編亦罕流傳以三山士夫未著錄者一旦有之足以豪矣特其體例附山川於寺觀之末未免失倫然十國之事可徵信者多有出於王氏入閩通志王氏闢大紀何氏閩書之外學者所當博稽也潛研堂文集云梁克家三山志四十卷宋史藝文志謂之長樂志其實一書也今本作四十二卷其第卅一第卅二兩卷進士題名乃淳祐中福州教授朱貔孫續入攷目錄本附於第卅之後但

云第卅中第卅下未嘗輒更舊志卷第後人析爲四十二卷又非獬孫之舊矣志成於淳熙九年五月而知府題名增至嘉定十五年他卷間有闕入淳祐中事者皆後人隨時僂入也宋史本傳於乾道罷相以觀文殿大學士知建康府之後卽云淳熙八年起知福州據志克家於淳熙六年三月以資政殿大學士宣奉大夫知福州則傳稱八年者誤志又書八年五月復觀文殿學士此卽史所載趙雄奏欲令再任降旨仍知福州事是時克家蒞任已滿二年故有再任之旨因復其職名史誤以再任之年爲初任之年則甫經到任不當云再任矣且克家於罷相時已除觀文殿大學士越數年起知福

州止帶資政殿大學士又二年始復觀文殿學士仍無大字則知建康以後必有落職奉祠之事而傳皆闕之世人讀宋史者多病其繁蕪子獨病其缺略缺略之患甚於繁蕪卽有范蔚宗歐陽永叔其人繁者可省缺者不能補也因讀此志爲之喟然

吳郡圖經續記

宋朱長文著三卷舊鈔本前有元豐七年九月十五日州民前許州司戶參軍長文所上序後有元祐元年臨邛常安民書後元祐七年大雪編戶林虔後敘元符三年朝請郎通判蘇州權管軍州事祝安上刊書敘紹興四年漣水孫佑重勘跋末附元祐元年朝奉郎中書舍

人蘇軾同鄧伯溫胡宗

下缺數字

劄子內硃筆評點稱

義門先生爲先師有從宋本校勘處頗多補正

先君

子書後云續吳郡圖經世閒傳本絕少而此本爲秀水

濮自崑先生手校尤爲可寶余三十年前嘗偕鮑綠飲

遊吳中購得之珍藏至今每一展卷覺古香襲人後世

其善視之嘉慶辛酉記

簡莊徵君復以宋本校卷三

修撰程公師益一條上補元豐四年資政殿學士太子

少保元魏公絳正議大夫集賢殿二十四字後記云嘉

慶十一年秋勃海陳鱣借校一過時寓中吳別業

卷末一

行云潛熙改元琴川徐日新觀於中山書樓

續吳郡志

續吳郡志二卷舊鈔本前有戒菴老人自序云吳郡志以蘇松東南二府大志也紀載郡之封域山川戶口物產人才風俗以至城池廨宇井邑先賢之遺蹟下至佛老之廬皆次焉二府東南大都其風土亦已略見於禹貢周職方爾雅諸書如子貢之越絕趙曄之春秋張勃陸廣微之記錄羅處約朱長文之圖經龔明之輩紀聞紀事則備矣彙而成書則有范成大吳郡志由今而觀范志峻而整雖詳尚有未備者仙人隱士之居址名山勝境之出處菴觀寺院橋梁道路所興起之跡此皆前志所遺失也故續其志云

中吳紀聞

右六卷汲古閣刊本 先君子假得校本命兄壽照錄於上卷首書毛斧季從崑山葉九來借得舊錄本乃其先文莊公菴竹堂所藏故物開卷有文莊名字三印卷末一行云洪武八年從盧公武假本錄傳此書始自公武訪求校定復出於世此同邑錄傳之本宜其可從是正也後書庚戌穀雨日借得語古小齋校對本粗臨一過晚合老人記於南九曲灣寓舍又有綠筆係抱經盧學士所勘

茅山志

元槧本茅山志每葉二十六行行二十三字闕三四五六七十四十五七卷又文漁先生藏本卷一至卷八合

之得十三卷其十四十五二卷終闕焉 先君子書云
據六硯齋筆記此本的屬句曲外史手寫付梓者雖吉
光片羽猶宜珍惜

元大一統志

元槩大一統志殘本六巨冊自六十五至七百百五十
一中少九十七卷僅存三十九卷全卷二十八不全卷
十一共四百三番每番二十行行二十字字大悅目其

方域則四川彭州

崇甯
濛陽

威州

通化

茂州簡州

新建

嘉定

府路眉州沔州蓬州重慶路夔州

永康

達州

彭水

紹慶

路等先君子跋見愚谷文存中此書有跋云竹汀集跋
見南濠朱氏本凡四百四十三番每冊首有處州路儒

學教授印其方域則河南湖廣陝西浙江等省元修一

統志凡二本一至元二十三年札馬刺丁虞應龍等修

成於二十八年

七百五十五卷

大德初復從趙忭請命卜蘭禧

岳鉉重修按宮詹所見蓋非此本

陽謹按宮詹文集跋又云史以學蘭所爲

卜蘭禧譯音之轉也

第六百十八卷劉易從作陳易從引彭州古

今錄唐高宗儀鳳三年云云先君子書條云按新唐

書吐蕃傳

二百十六卷

上元三年攻鄯廓河芳四州詔周王

顯爲洮州道行軍元帥率工部尚書劉審禮等十二總

管等討之李敬元率審禮擊吐蕃青海上審禮敗沒無

儀鳳三年事疑工部尚書卽易從之父一統志惜未詳

其名耳陳易從前古跡門九女冢作劉易從此蓋誤作

陳然明一統志名宦亦誤作陳俟更考之

敬元此誤通作敬立

鑑紀事本末載劉審禮父子事甚詳又後易從坐李敬業事云云下書曰按劉易從事舊唐書謂李敬貞誣搆而死新唐書謂爲酷吏周興誣搆而死初不言李敬業且敬業敗於嗣聖元年至永昌時已五六載元一統志疑有誤

元混一方輿勝覽

元混一方輿勝覽三卷不著撰人名氏元槧巾箱本每葉二十四行每行大小字俱二十字畫端楷紙墨古雅按潛研堂文集跋云云元混一方輿勝覽三卷無撰人名蓋書肆所刊其文簡陋然今時流傳者已少矣元史

地理志大都路領州十此云州九者龍慶州本縉山縣屬上都路之奉聖州延祐三年始升爲州故也成宗紀至元三十一年復立平陽之芮城陵川等縣蓋元初二縣曾廢此書澤州無陵川縣解州無芮城縣可證其刊於世祖朝而書中又有冀甯晉甯之名係大德中所改則刊成之後別有竄易要皆書肆射利者爲之而不自知其抵牾也大甯路有霍州景州史志無之此書亦未詳其沿革姑記之以俟攷余今夏得一銅官印文曰景州之印當爲河間路之景州背文曰宣課行乙未年三月日造無年號蓋蒙古太宗七年印也

海甯縣志

縣志九卷明嘉靖間知海甯縣事古亭蔡完所修首有
自序後有海甯學諭東吳張志跋此冊爲茗上書林家
良輔翁所贈先君題云蔡古亭明府海甯縣志在談孺
木先生輯海昌外志時云其板尚藏庫中迄今百數十
年卽印本且不多見予訪購有年昨歲聞梅里李氏有
是書屬茗上吳良輔物色之今夏始得卷帙完整洵足
珍也方良輔之得也中途有人欲邀之良輔曰息壤在
彼卒以遺予竟不持一錢而去是亦估而有士行者歟
乾隆四十七年立秋前三日槎客吳某誌

海昌外志

談孺木先生所著不分卷凡輿地食貨職官建置選舉

人物叢談藝文八門首自敘及樓鞏沈升蔡完序又許
令典及先生所作趙無聲先生甯志備攷引先君子有
題記數條

皇祐新樂圖記

皇祐新樂圖記三卷先君子購自吳中書後云皇祐新
樂圖記予購之於吳門錢聽默書林雖近手鈔亦尚不
惡至鐘字卽鐘字妄人逐字殊改可笑之甚自來古書
遭庸妄子任意改竄不知凡幾矣乙丑冬日按潛研堂
文集謂宋史樂志書以瑗爲大理寺丞儒林傳書樂成
遷太常寺丞與樂志異太常殆大理之訛

直齋書錄解題

書錄解題二十二卷武英殿聚珍本盧學士借校多所
補正凡字畫之不合六經者悉皆更定彌見前輩讀書
之精審深可寶愛簡莊徵君復校補十數條內卷十二
至卷十四卷十九至二十二先君子曾得舊鈔殘本手
校於上後以贈嘉興陳梅軒進士嘉慶乙丑簡莊得陳
鄉人從梅軒借錄本一冊以示先君子因復錄於是本
並書十四卷復云予向有舊鈔書錄解題殘本後以贈
樵李陳進士效曾效曾官楚中十餘年移疾而歸所患
乃失心之疾此書予未有副求前書一校此本亦不可
得頃簡莊從吳中購得一本則有效曾鄉人曾與效曾
借予殘本而手校者惜不知姓氏攷其所校時迄今已

二十有五年矣因復從簡莊借錄於此本不禁閣筆爲之三歎嘉慶乙丑兔牀志又書廿二卷末云嘉慶丁卯仲秋秀水王稼洲茂才過訪予出此書示之其十二卷中所云從同郡陳效曾所借效曾之姓名稼洲亦不辨稼洲名尚繩尊甫省齋大令元啟禾中篤學士也於效

曾爲前輩簡莊跋云近客吳中從書賈購得直齋書

錄解題係聚珍本中有朱筆校語初不知爲何人及閱

卷之十二上有標題云借同鄉陳進士贈所藏海甯吳

葵里鈔本殘帙校始知吾鄉槎客明經曾有舊鈔以遺

秀水家效曾進士而此君復從借校者也惜乎僅題年

月不著姓名觀其書法秀麗亦甚可愛會予歸里攜示

明經一見心喜如逢故人既爲重錄於盧抱經學士手校本上余復借盧校本傳寫對勘一過凡改正數百字并從文獻通攷補得十餘條其黃筆者皆是今而後庶幾可爲善本因念抱經學士已歸道山效會進士久患心疾而明經之年亦七十有三矣予得挾書往來賞竒析義能無欣感交至哉按陳振孫宋史無傳癸辛雜識別集載徐元杰一條知振孫于淳祐四年官國子司業又會稽續志浙東提舉題名有陳振孫端平三年二月初六日以朝散大夫知台州兼權八月正除十月二十六日到任嘉熙元年改知嘉興府是振孫由浙東提舉改知府屬太鴻徵君宋詩紀事作浙西提舉誤也 四

庫全書總目又引癸辛雜識莆田陽氏子婦一條稱陳伯玉振孫時以倅攝郡又陳周士一條稱周士直齋侍郎之長子謂振孫始仕州郡終官侍郎不止浙西提舉然檢毛氏汲古閣所刊癸辛雜識無此二條未知總目所據何本且云浙西提舉亦承厲氏之誤耳此書有隨齋批注不書姓名錢辛楣詹事養新錄云元時有楊益字友直洛陽人官至撫州路總管所著有隨齋詩集或卽其人因附書之嘉慶十年七月海甯陳鱣記

菴竹堂書目

葉文莊公菴竹堂書目鈔本二冊前有公自序係從涇東橐錄出間有缺字後有五世孫恭煥七世孫國華二

跋每書不記卷數但書幾冊自序謂葉氏書目六卷今此本不分卷序後附書廚銘云讀必謹鎖必牢收必審閣必高子孫子惟學數借非其人亦不孝可爲世守藏書者之善則

絳雲樓書目

右鈔本不分卷凡上下二冊首有曹倦圃先生題辭水有倦翁後跋

千頃堂書目

千頃堂書目三十二卷杭堇浦太史道古堂藏書未有太史手跋云右千頃堂書目金陵黃俞邵所輯俞邵徵修明史爲此書以備藝文志採用橫雲山人刪去宋遼

金元四朝刺取其中十之六七爲史志史館重修仍而不改失俞邵初指矣元修三史獨闕藝文全在明史綱羅如後漢晉不列此志隋書獨補其闕不必定在一朝也歲在辛亥從曝書亭朱氏購得此本亟錄出以箴中官之失說者得無笑其迂乎戊辰六月一日舊史杭世駿又書云其中宋人著作係宋史藝文志所遺非複出也緣飲先生爲先君子購得復從抱經學士借金陵新校勘補又從道古堂遺文內補鈔黃氏書錄序子卷首內地理一門太史序言增補先君子以爲還閱此書又不如所云疑此外別有一本復取諸家書目續補徧書於上詳愚谷文存跋語中又別紙錄抱經學士與

其弟書云黃俞邵有明史經籍志原稿體例較好今千
頃堂書目乃從此出雖增添甚多而雜亂無序是賈客
之帳簿而已我已先鈔得書目今難于改易只得將黃
志細細校補所增添小注甚多并書目之所漏者亦間
有之俱補全矣我晚年要搜尋桑梓人物并涉吾宗者
俱要訪求

讀書敏求記

右刻本四卷先君子校閱記後云此書未刻之前最爲
難得錢塘吳尺鳧先生嘗言竹垞檢討典試江南與遵
王會飲私屬錢氏侍史竊出一鈔償以美裘一襲白金
十兩蓋前輩之好古如此亦可起敬也此刻視鈔本間

多舛譌惜未得一校姑俟異日求之壬辰四月某記

嗣從朱朗齋文學借汪氏振綺堂校錄瓶花齋藏本對

勘朗齋書後云此爲友人朱秀才映濬手校本乃振綺

堂主人

卽所稱東軒主人

從家甌亭上舍借瓶花齋藏本屬映

濬校勘者據諸君跋語其丹黃已不下四五過然子細

閱之此本之譌舛脫略固多而振綺本亦未爲盡善故

二本之互異者各書之簡端俾映濬更加覆校庶幾二

本各歸精當耳 又傳錄諸跋于卷首 尺鳧先生跋

云絳雲未燼之先藏書至三千九百餘部而錢遵王此

記口口有一種皆紀宋板元鈔及書之次第完缺古今

不同手披目覽類而載之牧翁畢生之菁華萃于斯矣

書既成局寘枕中出入每自攜靈蹤微露竹垞謀之甚力終不可見竹垞既應召後二年典試江左遵王會於白下竹垞故令客置酒高譙約遵王與偕私以黃金翠裘予侍書小史啟鐫預置楷書生數十於密室半宵寫成而仍返之當時所錄并絕妙好詞在焉詞既刻函致遵王漸知竹垞詭得且恐其流傳于外也竹垞乃設誓以謝之竹垞既重違故人之命而又懼此書之將滅沒也暮年始一授族子寒中余聞之久矣然知其嚴祕勿肯與近者校讐諸書寒中閔予之勞竟許以贈余以白金一斤爲壽再拜受之亦設善辭焉嗟乎書乃天地大公之物也然有可傳有必不可傳正如修丹者既成人

皆可餌而烹煉之方非堅精凝潔者弗能守然猶可傳者丹之法而必不可傳者丹之道大道在人非其人莫與則斯志也已書之卷末示我後人康熙五十六年三月十八日錢唐吳焯 □□先生跋云此書向惟曝書亭藏有鈔本珍祕不出先君子以重價購得之稼翁晚年力不能守元鈔宋刻雨散雲飛而此書遂流落人間吾友趙君用亨爲刻之吳興卷端冠序一首借先友傳編修玉笥之名傳不知也偶於書肆中見之大怒且以舊史官三字爲犯時忌徧告當事欲毀其版幾允所請賴先子解紛得寢然用亨亦因此愧憤不復刷印示人矣信乎古今典籍傳與不傳蓋有一定之數不可強也

乾隆丁巳小除日錢唐吳城記於瓶花齋又跋云絳雲一炬祕本不可復見遵王著敏求記一書後人賴之以攷證天水鐫板行世有功典籍匪淺當時不乏文人必借玉笥太史之名以弁其首較之題碑祝嘏不猶愈乎玉笥翁何亟亟於求毀耶斯亦可謂不愛沽名者矣小谷跋時甲申臘月既望燈下

右繡谷亭本跋語三則

朗齋先生

記此後云此書東軒主人藏本二一爲吳石倉先生鈔本二册一卽此本趙谷林先生藏鈔本四册從丁龍泓先生手鈔繡谷亭初校本借鈔者也其後繡谷先生覆校三次改抹之處此本未經是正乾隆丁亥八月一日主人從甌亭先生借得繡谷亭本屬文藻重校嚮所疑

誤者改正凡百餘字此本洵完善矣文藻後進未學何
幸得窺先正口修之祕而私淑老成嗜學之勤撫卷沈
思愧喜交集仁和後學朱文藻記 先君子書此數跋
後云右跋凡四則從武林汪氏振綺堂所藏小山堂舊
鈔本傳錄予嘗病刊本多誤間以硃筆評校終未能釋
然乾隆甲午從書局中見此本因亟假歸覆勘更有數
跋附錄于後凡綠筆者皆是也旃蒙協洽六月一日免
牀某識 尺鳧先生跋云遵王撰成此書祕之笈中知
交罕得見者竹垞檢討校士江南日龔方伯徧召諸名
士大會秦淮河遵王與焉是夕私以黃金青鼠裘予其
侍史啟篋得是編命藩署廊吏鈔錄并得絕妙好詞既

而詞先刻遵王疑之竹垞爲之設誓而謝之不輕授人
也晚年稍稍傳出江南舊家間有之予從馬寒中得授
此本惜其字多繆誤蓋當時半宵寫成未經校對其間
書雖不多宋版元鈔要皆奇祕眞書林之寶也吾友敬
身丁君獲此本於石門呂氏此又從竹垞已亡後其家
竊錄而出錯誤更多偶以余所藏本校其大概尙未盡
也嗟乎牧翁以十萬金錢購置奇書而遵王耳聞目見
盡平生之致力僅載此六百餘種所謂選其精華觀者
不當以尋常書錄視之也雍正甲辰冬至月廿又六日
燈下焯 谷林先生跋云是本向吾友丁敬身借鈔有
繡谷手校記語誤繆處十正八九聞石門袁舒雯家藏

善本俟再取校之甲辰除夕小山堂錄畢谷林 又第一冊後記語二則云雍正甲辰至月蟬花居士取禦兒呂氏明農草堂善本手校是月小盡燈下記丙午秋闈後以趙用亨新刊本再校朗齋先生書此後云右二則見繡谷亭本第一冊後乾隆丁亥八月二日文藻校錄第二冊後記語三條云十二月十日校畢并呂氏本參勘付城南丁敬身焯記明年乙巳再校一過小年朝石門舟中記又明年丙午吳興趙用亨已將此書梓行惜其譌字過多與之校正又對一編此本又改正數字重陽後二日朗叅先生書此後云右三則見繡谷亭本第二冊卷終八月三日校畢錄於此以見先生校勘之勤

如是也文藻記

也是園藏書目錄

右鈔本一册不分卷無序目

傳是樓宋元版書目

傳是樓宋元版書目一册先君子手寫本後有黃梨洲先生傳是樓藏書記汪鈍翁邵青門二先生傳是樓記

傳是樓書目

傳是樓書目三册不分卷無序首册總目分四部以周興嗣千文編號內有黃筆墨筆補記處先君子書後云傳是樓書目二册雖蝨簡塵編然上下旁行之注猶是東海手筆也勿易視之兔牀記 又鈔出六册亦不分

卷知不足齋主人所贈係綠飲先生手錄

道古樓書畫目錄

右鈔本五冊目錄一冊先君子記云此爲插花山馬寒中上舍所輯上自三代下迄有明凡金石碑版以至法書名畫真蹟題跋靡不甄錄蓋將勒成一書如珊瑚網清河書畫舫之流此乃其草創總目上下添注者猶是寒中手筆予夙負書畫之癖恨生也晚不及與前輩周旋縱觀道古樓收藏之富癸卯殘冬花山後人有持此數帙屬沈呂璜孝廉求售人無應之者余遂購之雖知其殘缺不全亦以見前輩好古之殷云爾乙巳杪冬兔牀書

延令書目曝書亭書目靜惕堂書目

右三種合爲一冊知不足齋鈔本每種後題重錄歲月並鈐知不足齋鈔本圖記先君子書延令宋版書日後云嘉慶乙丑黃蕘圃刻此目于吳下

汲古閣書目

右鈔本一冊不分卷無序目間有說見各書下

汲古閣刊書細目珍藏祕本書目

汲古閣刊書細目子晉先生所記每部皆記頁數每類又記總頁數先君子有補遺一紙夾書中計王肅注家語王逸注楚詞羣芳清玩五音韻譜牧雲和尚七會餘錄宗本投機頌病遊二刃病遊初草病遊後草等簡莊

徵君又書羣芳清玩種數及頁數細目一紙先君子記其後云右吾友簡莊所記予未曾見此書庚戌暮春過松陵楊慧樓進士案頭適有此書恍焉如對故人時與簡莊別三年矣汲古閣珍藏祕本書目斧季先生所記每部皆記價值蓋以書歸潘稼堂先生此其細目也凡與時本不同者略記數條足資證據未有從孫琛題語

元祕書監志

祕書監志十一卷元承務郎祕書監著作郎王士點承事郎祕書監著作佐郎商企翁同編首載至正二年聖旨竹垞檢討序稱祕書監志而書題祕書志先君子書云曝書亭集作祕書監志監字似不可少又書目錄前

云此志既用國書語多鄙俚而每卷立題尤荒謬不通恐并非王商手筆或後人妄撰此目未可知惜竹垞竹汀諸公均未論及書卷末云丙寅五月仲魚孝廉爲予從吳中購得此志其卷數門類與十駕齋養新錄所載悉同惟葉數養新錄共二百六十五葉而此計二百六十八葉豈宮詹所見本尙有闕葉歟此本舛錯甚多予雖以意校終未能釋然復屬仲魚訪之三吳藏書家率與此本無異仍攜以見還仲魚亦照錄一部弄於紫微講舍嗟乎宮詹往矣誰復與予輩再訂此書耶嘉慶己巳五月吳某記

拜經樓藏書題跋記卷三終